

Feihyiz Guekgya Gaep:

Baenzdauq Hozdung Baebo Myauzcuz

□ Daengningh/cingjeix Ouh Caijfangh/hoiz



▲ Neix dwg ciengzmienh baebo.

◀ Gij ciengzmienh aen hozdung baebo bi 2015 Yungzsuij Danenz Yangh.

Baenzdauq baebo Myauzcuz, dwg Yungzsuij Myauzcuz Swciyen gak yanghein mbanjyok youq moix bi liggaueq ndwencieng cosam daengz cibcaet mboengq neix banh gij hozdung ngoenzciet ndeu. Duenh neix moix ngoenz cungj guh baez baebo ndeu, laebdaeb mboujduenh, de dwg ngoenzciet cojcienz ndawbiengz gvaq ndaej hoenghhwd, aeu Myauzcuz guhdaeuz gak cuz lwgminz vih geiqniemh goengcoj, siu cai gouz fuk, vunzlai doxcomz guh-angq ndeu.

Ciuq bouxsughangz gaujcingq, Myauzcuz Yungzsuij miz aen fungsug ndeu: Ndwencieng coit mbouj ndaej boq venz mbouj ndaej ok dou, congeih ndaej boq venz mbouj ndaej ok mbanj, daj cosam daengz liggaueq cibcaet dwg mboengq seiz vunzlai guh'angq, duenh neix gak mbanj mboujlwnh bouxlaux bouxiq bouxsai mehmbwk cungj daengx ranz okdoengh bae liux, seiqlengq baebo. Daengz liggaueq cibbet, couh daengz seiz guh hongnaz lo, gak mbanj cungj fung aenvenz hwnjdaeuj, cigdaengz seizsouhaeux sat le cij ndaej haifung. Gij fungsug neix ndaej hawj baebo Myauzcuz Yungzsuij dingzlai comz youq ndwencieng cosam daengz cibcaet mboengq neix, ndawde laebdaeb banh mboujduenh, baebo ndaej doxlien lumjbaenz diuzlien ndeu, vunz dangdieg gaengawq ngoenz banh baebo gonqlaeng bae baizmingz, daj "bo daihsam" baiz daengz "bo cibcaet" bae.

Mbanj Myauzcuz Yungzsuij baez banh baebo, seiqhenz geijcib goengleix gyoengq bouxcoz cungj daenj hwnj buhvaq gyaundeidei ngoenzciet, boq venz sasa, angq comz youq gwnz ndoi; mwh haenx gwnz bo vunz cien vunz fanh, mbawgeiz biufiegieg;

cawz le diemjieng cuengqbauq, lij guh foux lungz, saj saeceij, maxdoxdik, roegdoxdok, gwhimax beij vaiq daengj hozdung. Ndawde aeu maxdoxdik ceiq haenqrem ceiq yungyiemj lo, ndigah hix ceiq ndaej vunzlai maijgyaez. Cibgeij duz maxdaeg ciuq gonqlaeng doxdik, bouxcawj duzmax ndaej daih'it haenx, mboujdanh ndaej ciengj, hix ndaej vunzlai dang guh bouxak.

Ngoenz baebo hix dwg ngoenz hab ra caen cam youx, doiq bouxcoz guhyoux daeuj gangj, ngoenz baebo youh ndaej caeuj bouxyoux raennaj gangigoj gyausim lo. Youq gwnz bo lwgmbauq dahsau baenz gyoengq baenz bang comz youq giz ndeu, doiq fwen Myauzcuz, lwnh ok maqmuengh saedceij ndei caeuj ra ndaej ndiepcingz gyaundeidei.

Youq duenh guh hozdung baebo diuq gij foux caijdangz haenx, dwg cungj foux daiyauj Myauzcuz ndeu, geijcib boux dahsau daenj buhvaq gyaundeidei, humx baenz aen gvaengz ndeu diuqfoux, heiqfaenh vaiqvued,

ciengzmienh yiedlied.

Aenvenz dwg yozgi Ranzmyauz ceiq maijgyaez lo, moix baez baebo cungj miz aenvenz cijbaenz, doengh fwen venz miz fwen coux hek, fwen soengq hek, fwen cam loh, fwen angqyangz daengj, lai cungj lai yiengh, sing goksasa saenqdoengh mbwndeih.

Hoeng, aenvih souh yendaiva yingjyangj, fuengsik gyoengqvunz gvaq saedceij bienq yiengh lo, caiqlj vunz lajmbanj haujai cungj haeuj singz bae dajgoeng, baenzdauq hozdung baebo Myauzcuz hix cugciemh bienq noix lo.

Guekgya raeuz gig yawjnaek baujhoh doenghij feihvuzciz vwnzva dijbauj, 2006 nienz 5 nyied 20 hauh, baenzdauq hozdung baebo Myauzcuz ndaej Gozvuyen baecinj liedhaeuj buek daih'it guekgya gaep feihvuzciz vwnzva yizcanj mingzloeg.



▲ Maxdoxdik haenqrem youh yiedlied.



▲ Boq venz youh diuq foux.



▲ Bouxcoz Myauzcuz baebo.



▲ Dahsau daenj buhvaq gyaundeidei, angqfwngfwng baebo.



▲ Bouxguekrog daenj hwnj buhvaq gyaundeidei Myauzcuz, naj riunyunnyum.

◀ Bouxcoz Myauzcuz gwed aenvenz bwh ndei lo.